

D'ou vint èt poqwè ç' qui dj' so véci al sicole di walon.

Nosse Maïsse, mès bons soçons, mès djins,

Vola, on-z-a fièsté mès-ans li doze di févri. Dji n'a pont d' gougouyes po vos-ôtes mins dji profite di l'ocâsion po vos dîre dovint qui dj' so véci, si vos v'loz bin.

Quand dj'èsteûve one maraye, mès parints ont fait bâti one maujone dins l' viladje di Loyi, nin lon d' Dinant èvou ç' qu'on mougne dèl flamitche. Dj'aveûve aviè chîj ans ! Mès parints n' sont nin Namurwès, savoz. I provègnenut di l' Ârdène.

I 'n causin.n' qui l' françès.

Avou nosse man, dame di scole, faleûve causè comufaut, nin minme sayi d' mète deûs mots d' walon èchone.

C'èsteûve jusse on lingadje di cinsîs, parèt-i !

Èt portant, pad'vant l' posse, on còp pâr mwès, li dîmègne, si dji m' sovin bin, nosse pa èt nosse man riwaîtin.n', d'on bon-ouy, one pîce di tèyâte è walon, one gaïye comèdiye di trwès-akes, po l' mwins' !

Djè l's-ètind co rîre à disfaufiler leû botroule èt mi, dji riyeûve à pichî dins m' culote d' lès veûy s' amûsè !

Mins après, i n'èsteûve nin quèstion, minme di sayi, d' mète deûs mots d' walon èchone !

Èfant, pace qui dji d'mèreûve dins on viladje, dj'a sovint choutè lès djins, lès vwèsins causè l' walon, mins dji n'aveûve nin l' front di d'visè avou zèls. Pusqui ça m'èsteûve disfindu !

Dins m' tièsse, li walon a portant todi d'mèré on bia èt on bin riv'nant lingadje.

Saquants-anèyes au long, dj'a pwarté l' walon dins m' keûr, sins mète deûs mots d' walon èchone, mins dj'aveûve li dâr, on djoû, dè l' situdyi, dè l' tchafyi èto. C'èsteûve come on sondje !

Gn-a nin si long qu' ça, c'èsteûve l'anèye dèl musique, è 2004, don.

Là èvou ç' qui dj' boute, dji d'veu tusè à one saqwè d' novia po ratirè, donè l' dâr - come li suke assatche lès copiches - po qu' lès maïsses èt lès dames di scole èt lès dimwèsèles po l'-s-èfants al fachète - qui boutenut dins lès crèches adon -, apudenuche à dèss djon.nes-èfants à tchantè dèss bèles èt totes nozèyès p'titès tchansons.

Savoz bin qwè ? Dj'a pinsé à fé l' fièsse, à mète au prumî rang, dèss bwagnes contes, mins... è walon !

Dj'aveûve tchèyu su on bia lîve da Djôsèf Dèfrècheux.

Djôsèf Dèfrècheux, c'è-st-on Lidjeû. Il a skèpi en 1853 èt il a rachoné one masse di tchansons, di bwagnes contes, adon ... come on trèsôr !

Po qu' mès djins seûchenuche è raprinde saquantes, dj'aveûve minme sitî dins on studio, èt-z-èbarquè trwès comères qui vraïmint tchantin.n' fwârt bin, on n' saureut mia ! Nos-avans mètu au monde one plaque, on compact disc, po s' sov'nu d' l'aîr èt dès paroles dès tchansons, adon !

Èst-ç' qui ça n'èsteûve nin one fèle idèye, qui tot ça ?

Insi, vo m' la pad'vant lès djins, à dîre, à fé lès djèsses, à fé l' gugusse, à tchantè di totes lès manières, mès p'tits bokèts !

Vos v'loz on-ègzimpe ? Oyi ?

« Li p'tit' soris qui danse
Tot avou lès plantches
Èll' aprotchi si près dès feu
Qu' èl' sa brûléye lès djambes
Tchouf mère... qui dja tchôd !
Catch' tès pîds mâssi crapôd ! »

Mins, quand c'èsteûve au toû dès dames di scole èt dès mamezèles dès créches di tchantè, dj'a tchèyu rade su m' cu, savoz !

Saquantes, tapenut l'uch al vole, dès-ôtes si mètîn.n' à tchoûlè ! Dj'èsteûve paf ! Dj'a v'lu comprinde poqwè tos cès pètemints-la èt djè l's-a choutè :

« Vos d'vrîz yèsse mau onteûse di nos-aprinde à tchantè è walon...

Li walon, ci n'èst qu' sauvadjeriye, c'èst po lès bâbauds, lès baudèts, lès bauyauds, lès-èwarés ! Èmon nos-ôtes, c'è-st-on lingadge di warache, po payisan qui n' sét ni lire, ni scrîre !

Nos parints ont souffri, ont sti fwârt pûnis à scole, il ont yeû dès tchofes po causè l' francès comifaut . I n' volin.n' nin ètinde causè on lingadje què l'zî fieûve afront ! »

Dj'aveûve on keûr bin pèsant, savoz , d'awè choutè tos cès maus-la !

Ça, c'èst l'vraî, dj' ènn'a yeû pèsant !

Qu'èst ç' qui dj' a rèspondu ?

« Dins ç' monde-ci, i-gn-a dès-afrontès, des maus-apis, pa tos costès. C'èst comèladje èt fwârt damadje di crwêre qu'on patwès c'è-st-on lingadge di baraquîs.

Po sawè quî ç' qui n's-èstans, on n' pout r' noyi nos racènes. Li walon, c'è-st-one éritance, c'èst noste istwêre. Nos n' divans nin fé chonance èt rovî d'èwou ç' qu' on vint ét ratchî d'ssu nosse patrimwin.ne.

Li walon n'èst nin one sauvadjeriye, qui do contraire ! I vike dispu bin d'vant lès Gaulwès.

Li walon, c'è-st-on parint do francès, mins i nè l' faut nin prinde po on patwès d'ovrîs, d' cinsîs, di p'titès djins, come on fait co trop sovint.

Yèsse cinsîs, yèsse ovrîs, èst ç' qui c'èst mau ? Comint mougî, comint awè one maujone sins zèls, èt dji n' ti sé co tot qwè !

Gn-a yeû dès boûrias, qu'ont mètu dins l' tièsse di nos tayons èt ratayons èt d' leûs-
èfants qui, po div'nu comufaut, on dwèt fé one crwès su s' prôpe lingadje !
C'èst l' vraî , c'è-st-one saqwè qui faît mau ! »

Fuchoz fiérs di vos ratayons, di vosse pays èt, audjoûrdu, dji mètreu avou, come
direûve Nosse Dame Chantal Denis : « Li francès èst sûr brâmint pus ritche di mots.
Mins l' walon, c'èst come nos vîyès pîres, il èst ritche dins s'-t-âme ».

Èst ç' qui ça a candjî one saqwè, èst ç' qui mès dames di scole èt mès mamezèles dès
crèches ont candjî d'idéye ? Franchise po franchise : nin dès masses !

Asteûre vo-m'-la pad'avant vos-ôtes. Dj'a faît ç' qui dj'aveûve è m' tièsse. Dji so-st-
apurdice al sicole di walon d' Nameur, vo-m'-ci qui cause li lingadje di nos tayons.
Asteûre, c'èst nin onk, ni deûs mots qui dj' rachone mins, en quate mwès, chîs cints po
l' mwins' !

Au d'pus qu' djè l' cause, au d'pus qu'i m' chone bia !
Èt dji m' rafîye d'è sawè co d'pus !

Seûchoz combin dji so binauje d'yèsse contin.ne, combin dji so fiére d' yèsse véci...po
lontimps, dji crwè bin !

Audjoûrdu dji di bin mèrci à nosse bon maîsse, c'èst dèl bèle bèsogne qu'i faît avoz nos-
ôtes èt co au-d'là ! Dji di bin mèrci à tote li compagnîye qu'a bin v'lu choutè m' babèye,
èto.

Come nos l'avans si bin apris, nos savans qu' lès Walons sont dès boureûs d' craques,
dji m' va mète su lès rangs po div'nu li rin.ne dès minteûses...Oyi, c'èsteûve bin one
risèye ...vos-auroz dès gougouyes !

Joëlle Spierkel, apurdice di 1^{ère} anéye

al fachète : emmailloté
mau honteûs, grossiér(e),
sauvadjerîye: grossièreté
payisan qui n'sét ni lire, ni scrîre: analphabète
Bâbaud : baudet, arriéré
warache : barbare
braîre, fé one braîrîye, tchoûlè : pleurer